

本朝分省人物考

人物考卷之四十二目錄

浙江杭州府一

王羽

張昇

鄒濟

凌雲翰

瞿佑

蔣驥

高得暘

桂洪王

姚伯華

高暉

潘中

李約

蔣暉

何頴

孫子良

俞益

趙新

柴車

周文

湛禮

王琦

孫景名

徐昂

夏時

徐琦

王榮

周安

于謙

周文

謝衡

朱祚

沈慶

蔣琳

張珍

鄒幹

陳信

夏時正

周子良

沈敬

夏誠

周倫

張珩

吳福

江玘

王獻

吳誠

彭信

何琮

李昂

項麒

劉泰

孫璋

林章

汪諧

邵琮

凌鎬

鄭環

張順

于冕

本朝分省人物考卷之四十二

南直督學御史西浙過庭訓纂集

門人蘇松備兵副使南郡熊膏叅閱

男 過銘盤

過銘孟

過銘簠

寧國府學生員嚴弘志

句容縣學生員劉孔揚全訂正

浙江杭州府

王羽

王羽字儀之錢塘縣人舉鄉試第一登洪武二十四  
年進士方正敦重恬默自持爲文根極理要  
不事支蔓子宗賢鄉貢進士仕淮府長史

張昇

張昇字仲高杭州人弱冠有才識推擇爲郡吏卽以  
清謹稱守以下咸禮遇之勤視簿書取嚴一介諸爲  
奸利者皆敬憚昇賢聲蔚起洪武間謁選超授吏部  
員外郎矢志堅貞終始無玷及卒上察其廉特給  
驛舟遣內臣送柩還鄉誠異數也

鄒濟

鄒濟字汝舟其先嘉興人徙餘杭洪武十五年舉通  
經儒士授餘杭訓導累官平度知州博學修行能文  
章樂易無崖岸兼通老釋靖難後大臣薦修 高廟  
實錄錄成永樂元年陞儀制郎中已而修永樂大典  
諸儒臣推爲總裁征安南叅贊大將軍軍事草獻俘  
露布八年陞廣東叅政十年坐事改考功郎中 獻  
陵留守南京擇宮寮改右庶子進少詹事當是時宮  
寮多得罪徐善述王汝玉馬京梁潛周冕相繼下獄  
死濟幾陷死地者數矣竟積憂懼成疾 東宮憐之  
書問曰卿善自攝卽不諱卿苗裔余爲提携不使墜



本朝分省人物志 卷四 二  
入蓬蒿卒後 獻陵悼念舊學贈太子少保謚文敏  
建祠令有司春秋祀子幹 獻陵監國時遣入應天  
學給米月二石正統四年進士歷官太子少保禮部  
尚書致仕年八十四卒贈太子太保謚康靖

凌雲翰

凌雲翰字彥翀仁和人博通經史工於詞章領至正  
十九年鄉薦除平江路學正不赴作梅詞霜天曉角  
一百首柳詞柳稍青一百首號梅柳爭春韻調俱美  
洪武初舉杭州府學訓導陞成都府學教授卒所著  
有柘軒集

瞿佑

瞿佑字宗吉錢塘縣人學博才瞻風致俊朗年十四鄉人張彥復命賦雞詩美甚遂知名楊廉夫稱其爲千里駒洪武中以薦授仁和訓導轉臨安教諭陞周府右長史師道振舉輔弼有法永樂間以詩禍編管保安久之釋歸復原職內閣辦事年八十七卒所著有春秋貫珠詩經正葩閱史管見鼓吹續音存齋詩集行世其不及載者尤衆

蔣驥

蔣驥錢塘人自少穎悟知讀書年十二選爲郡庠生

從師受春秋淹通三傳得筆削之微旨弱冠領江浙鄉薦登洪武庚辰進士釋褐擢官行人奉命出使郡國姿貌清俊神氣秀朗所至人皆仰其風采焉永樂初與修高皇帝實錄旣成賜白金綵幣襲衣陞翰林院檢討自是日居秘閣得盡閱古今天下之書而學識益進聲譽益隆未幾復與修永樂大典承命爲副總裁書成忽爲人連逮繫獄十有餘年處之怡然未嘗有纖芥不足之色洪熙改元恩釋陞左春坊左司直事宣帝於儲宮小心謹慎克盡厥職宣德初陞翰林院侍講與修太宗仁宗實錄旣成有

白金文綺襲衣之賜進翰林侍講學士不兩月遂拜  
禮部右侍郎命下之日士林稱慶皆以爲儒者之榮  
遇莫此爲盛蒞事曾未兼旬而遽以疾卒訃聞上  
嗟悼親爲文遣官諭祭命給驛載其柩以歸詔有司  
爲治墳塋

### 高得暘

高得暘字孟升錢塘縣人洪武間以文學薦授臨安  
縣學教諭陞高州府學教授永樂初召爲宗人府  
經歷纂修大典爲副總裁進講春官博物洽聞  
詩文純雅名重一時所著有節菴集

桂衡

桂衡字孟平仁和人博學能文詩極穠麗每一篇出人競錄傳洪武中爲錢塘學訓導轉谷府奉祀卒于長沙所著有紫薇稿

王洪

王洪字希範仁和縣人年十七領鄉薦舉洪武三十年進士授行人陞給事中以文學遷翰林院檢討進修撰預修永樂大典爲副總裁進侍講主考禮闈時胡文穆公秉筆修史位在洪右每事輒咨之及文穆有所請洪輒不聽至欲載其家乘瑞應之徵洪力言

上前以爲不可取信天下來世胡深怨之左遷禮部  
主事無何卒洪少英雋有軼才與解縉王璉王僊王  
達善號東南五才子名重一時惜其文散逸不存居  
官耿介忠亮文章氣節表表時輩仕未通顯爲時宰  
所擠惜哉史官鄭叔美曰王子才高乎一世而行幾  
乎古人特以負氣敢言爲衆所忌可謂實錄

### 姚伯華

姚伯華桐廬人寓居錢塘生二十年未娶事父母極  
孝晨昏定省未嘗去左右父母年俱六十餘家頗溫  
厚值時艱難度不能存躬奉二親去匿閭原山中各

挾資費以行倉卒爲羣盜所迫投叢莽散失不知所  
在盜過父不虞後盜之至也出呼其子遂爲盜所得  
妻聞知賫所挾物馳救其夫盜併驅以去至一山澗  
路崎險夫婦不能步哀訴乞免盜怒並推崖下墜石  
死明日盜稍退伯華遍野號呼追求不可得哭聲徹  
天忽有指示曰爾親在崖下趨視之則皆死矣已用  
絳紬被二裹其父母以肩擔之乘夜由間道奔桐江  
下時江無舟渡躊躇間俄漁人棹小舟遠遠向岸來  
若有使之伯華出銀鐺一隻付之載以渡南岸復肩  
擔二骸至姚家山祖墳之右採樹葉掩之徐用木錐

圯土且飢寒無力又慮他盜之窺覬也晝伏夜作二晝夜冗成深可丈餘負二骸殯於穴仍負土築壘高三尺痛哭嘔血而出未幾我明有天下四海大定羣盜屏息民各復業於是伯華歸卽舊基而屋之孑然一身形影相吊乃因其族嫂宋氏聘錢塘楊氏爲婦生三子家業漸饒伯華恨二親死非其所每一念輒號慟對人語及悲不自勝計其遇難時二月也不知其死日故每臨二月則終月絕酒食不茹葷不接賓客獨擁爐自泣手持火杖畫灰隱痛裂肺肝淚傾注灰盡濕不已家人妻子或問之故不答勸之益鳴



咽弗能聲進飲食推去不能舉筋奉祀執爵哀哀呼  
泣如在膝下時雖路人聞之無不感動伯華記逃難  
日乏草履幾不免尋以銀釵購得之始獲濟遂終身  
手織草履以施貧乏弗較其直焉

### 高 曄

高曄字汝晦臨安縣人永樂甲申進士累官四川僉  
事潔廉好義自爲諸生時道逢遺金輒拾置墻隙中  
俟其人還之未嘗開視也民有訟田繫獄更數吏不  
能決曄至廉得其實立爲斷之後謝政去其人以黃  
金廐馬爲贈曄悉拒却邊夷感其德爲構却金亭以

彰盛美曄未老乞休野服蔬食意豁如也所著有復菴集讀易日錄

潘中

潘中字大本錢塘縣人永樂甲申進士授楚府伴讀爲人骨鯁負氣不依阿詭隨持身以禮貌莊而詞確與士大夫言計天下事正論侃侃同列皆敬憚之一官三十年雖以直道齟齬終無變屈旣歸家法嚴整閨門之內肅如也

李約

李約字孟博仁和縣人永樂甲申進士授兵部職方

士事丁亥左遷交趾通判未幾復職歷九年陞廣東按察司僉事每行部審繫囚聽讞精明直枉立判冤繫者多所平反人皆稱之調山東僉事永樂丁酉復入爲兵部員外郎進郎中兩使朝鮮不抗不隨人謂得使命之體時胡寇西鄙陞陝西左叅政督餉事竣還朝有僞稱校尉求郡邑賂遺者約籍其贓械送入京事連塞北邊軍及京衛軍反誣約居職方時受遺容隱約嘆曰自弱冠受朝廷厚恩今已斑白何心復與健兒語耶遂投劾去旣歸深衣幅巾徜徉閭里絕迹公府雅有士望年七十卒

蔣暉

蔣暉字廷暉仁和縣人曾祖鑑元鄉貢士爲池陽掾遷杭平準庫副許浦監稅皆有惠利在民暉自幼博學覃精藝苑善楷法永樂中以有司薦入翰林授中書舍人歷禮部郎中食四品廩餼兼侍書年七十致仕卒年八十八歷官四十餘年恭勤慎密出入禁闥未有愆違尤篤於親交賙窮恤死義槩凜凜黃養正姚震並有學行緣事謫戍暉爲言於朝皆脫謫籍爲顯官人益以是多之

何頴

何湏字彥容仁和縣人永樂甲申進士官刑曹郎持  
法嚴不撓貴勢京師至爲之語曰母縱誕避何鐵面  
受知 成祖每大獄親呼湏名使決之出知辰州裁  
抑豪強凡鎮守總戎殘擾市肆者悉舉正其罪民爲  
立生祠以祀湏致仕歸家居十年不入城市後以子  
琮貴贈通政使

孫子良

孫子良錢塘人洪武間貢入太學登永樂甲申進士  
選爲庶吉士與修永樂大典書成拜武選郎中 成  
祖北狩以尚書方賓從行 命子良攝部事時兵政

繁劇子良應答如流大爲監國所眷注侃侃持正  
請託不行人多忌之子良本以郎曹領部鈐制屬吏  
同列滋不能平羣口交妬遂落職謫交趾布政司吏  
夷俗素不喜學子良善道誘之皆樂漸濡德教多有  
成者洪熙改元以言者薦起椽屬拜交趾叅議已又  
改山東叅議督治河南道年七十上章乞休推山東  
叅政卒年七十八少善學詩出入唐宋諸大家所著  
有螺城集四卷

俞益

俞益浙江餘杭人由進士預修永樂大典書成授江

西靖安知縣廉平爲治民甚安之親喪服闋改知潛山縣潛山僻陋益撫綏加勞兼興學教其持已愛民始終一節學問長於春秋公暇輒以授諸生屢考鄉試會試明於鑒別宣德九年卒室如懸磬至無以爲歛吏民哀慕而助給焉

### 趙新

趙新字日新富陽縣人永樂初由國子生授工部主事擢吏部郎中精敏辨決長于運籌督儲轉餉茂著勞績擢吏部右侍郎巡撫江西綜核吏治使百司無廢務慮軫窮閭勤宣德惠以佐民急臨事籌畫每中

機宜長于合變至以漕淮之舟運西江之粟使兵農兩利民甚便之近世稱督撫之良者每推重焉仕終吏部尚書

柴車

柴車字叔興錢塘縣人遊郡庠從大章先生受春秋學成領鄉薦遂入太學永樂甲申擢爲兵部武選司主事以勤慎得名未幾陞員外郎己丑成祖北征與尚書方賓從行凡軍務倚辦隨機應變無留滯凡官屬從者又能庇佑之衆皆樂從及還陞江西叅議時營造事嚴命入閩中取大木丁夫之貧病者處之



有方故事集而民不告勞初經廣信太守與車有舊饋密一罌車疑其重發視之皆白金笑曰此所謂故人知君君不知故人卒拒不納至閩縣有婦人抱嬰兒哭訴曰夫亡田產見奪於豪橫車察實移文所司還之歲餘入爲職方郎中職方事最繁治之有餘力會謠言當有變詔沿江郡擇賢守以車知岳州鎮以恬靜民安之公事之暇則至學宮與諸生講學或行田間視耕穫賞勤而戒惰居三歲郡大治復召爲職方郎中丁內艱奪情任事宣德庚戌陞兵部右侍郎尋轉左侍郎正統元年阿台朶兒只伯寇塞下西鄙

戒嚴 英宗命將往經略之俾車叅贊軍務凡發卒  
蒐騎積糧餉爲戰守備皆有條法 上嘉之賜織金  
綺衣一襲先是虜入鎮副總兵劉廣自涼州出兵往  
援遇虜而退虜隨逼涼州廣閉門不敢出虜大掠而  
去廣不以實聞反奏功微賞車劾其罔上又陳其欺  
誑不法事甚悉請必寘之法 詔械廣父子至京又  
劾奏寧夏等守將失律亦召還 上益以車公廉詳  
慎爲國盡忠 賜以白金文綺車前後章疏十上皆  
剴切人或以後患怵之車曰吾敢愛身以誤國也每  
有功賞雖 勅下必覆驗而後行詐冒必糾正無毫

髮私岷州土官都指揮僉事後能以家人冒功得陞  
賞具奏罷所陞官能覆以爲請 上宥之又反覆論  
不可曰詐冒如能者非一人臣方按覈皆請罷今宥  
能如餘人何若無功而得官則捐軀死敵者何以待  
之 朝廷倘以後能土人宜寬假則以他名賜之爵  
人莫敢援例若詐冒而陞臣實以爲不可 詔嘉其  
忠誠特食從二品祿三年以秩滿陞尚書仍兼軍務  
旣而事平召還賜以羊酒命視部事且侍經筵聽講  
其年八月告歸省墳墓 上可之然欲託以邊事命  
車速來已而還朝感疾命太醫日往視而疾益甚數

驚悸起曰誤事誤事命速治行蓋心不忘忠而忘其身之病也 上聞而憫之卒年六十七

### 周 文

周文字宗武仁和縣人永樂甲申進士授翰林庶吉士時修永樂大典天下文學之士咸在館局獨雅推文有纂述能聲稱赫起然亦以是不得終在史館出爲兵部主事遷員外郎轉湖廣叅議黃州歲大稔流移滿野道饑相望文多方籌畫以濟又盡捐俸入以倡富民分粟先拯其急及事聞得請亟發倉賑濟全活甚衆無何以疾卒部民擁道哀號至爲服以送歸

櫬

湛禮

湛禮字用和錢塘人永樂甲申進士授內江縣知縣  
陞大理評事再遷至韶州府知府韶歲貢滕而產于  
南海禮爲疏于朝得免貢又曲江豪民二十餘戶皆  
投充軍戶以免糧差禮乃列其狀以聞事得勘正嘗  
遣隸卒往樂昌督稅法外需求無已令械繫以來禮  
下教曰暴橫殃民法之所禁令能不以府役故屈法  
貸之其賢可知矣由是府役至邑皆斂戢不敢肆有  
已經讞斷復誣訴于藩司者藩司知其僞命禮按致

其罪禮慰遣去約五月來辨竟亦不加罪也其寬厚類如此清白自持始終無替及引年歸貧乏幾不能自存

### 王琦

王琦字文璣仁和人永樂甲午科鄉貢試禮部副榜授南陽汝州學正潔身先士卓有師模擢監察御史廉明勤慎風裁凜然尋陞山西按察僉事提督學校士風丕變以母憂去起復值蜀患劇盜改飭四川兵備物論難之琦捧檄曰事不避難臣之職卽就辟風威遠振盜賊解息蜀競異之已而知道與時違不能

狗人俯仰疏乞休致年踰五十歷官清白家無擔石  
之儲衣敝以紙補隙在官門無私謁平生不治生產  
居家陶如也歲大侵無以供朝夕冬旦暮大雪連旬  
僵臥不能出門戶人有饋者非故舊推不受卽故舊  
餽數亦却之鄰有唁之曰當道雅重公試一言何所  
不濟琦曰吾求無愧於心耳心苟無愧雖饑且寒無  
不樂也何唁之杭守胡君濬聞其貧餽之不受奏聞  
于朝欽賜百金琦北面辭謝曰在官叨祿周貧以粟  
不以粟而金無功豈敢受乎後竟以餓寒卒

孫景名

孫景名字克正富陽縣人孫鍾之後永樂戊戌進士授福建道監察御史改揚州府推官調臨江折獄詳慎有瑞蓮生治事廳沼陞知涿州蝗不入境調潁州興學校恤流逋麥秀至三五岐人歌誦之

徐昂

徐昂字仲規錢塘縣人永樂初由舉人授兵部司務陞刑部員外郎昂謹愿無他技能獨斤斤以廉隅自守有武士謝某者暮夜懷金來饋昂謝曰君以暮夜餽金豈不聞四知可畏乎堅却之謝慚退無何昂致仕還過姑蘇病卒貧無以殮謝聞之爲具棺衾遺之



人謂昂介特謝君長者清節高義庶幾兩無愧云

夏時

夏時字以正錢塘縣人永樂戊戌進士授戶科給事中洪熙改元議改鈔法時力言其擾市肆無裨國用疏留中不下已而泉幣大阻民輒犯禁議竟寢于是上思時言命侍皇太子祀祖陵孝陵所至遇歉輒建白發倉賑之留署南戶科宣德初一日三上封事稱旨命署尚寶司兼吏禮兵刑四科事身視七篆綜核靡遺事無愆滯才望赫然六年查後湖黃冊陳便宜十四事至今行之擢江西僉事進

叅議以大臣會薦超擢廣西左布政使前後所上又  
十餘疏皆國家要機事雖不盡見信用識者韙其敢  
言其爲僉憲時進知州柯暹所爲教民條約均徭冊  
式刊布而行之遂爲令甲年未七十致仕歸卒生平  
潔廉好義篤孝二親及親歿廬于墓次哀號不輟致  
烏巢芝產之異鄉人以時德行足爲鄉邦矜式乃謀  
建祠于石人嶺以祀之請于郡守張禧事聞當道一  
時鎮巡藩臬大吏咸爲嘉嘆題其祠曰孝廉

徐琦

徐琦字良玉錢塘人登永樂乙未進士授行人遷南

職方員外郎宣德間黎利父子相構倡亂南鄙廷臣  
議撫之擇庶僚有才望者以行乃擢琦行在右通政  
持節往諭琦至彼激以父子之言利感泣卽遣使輸  
款併獻方物使還遷兵部右侍郎未幾命琦再往則  
黎已死其子麟蓄疑未服厲聲曰國家兵力百倍爾  
國若父崛起強猶俛首臣服况爾耶強麟行又欲質其  
愛子麟恐鑄金人鐫父名於背遣使請罪於朝 上  
大悅宴賚特厚遂命落琦戎籍益異數也進南京兵  
部尚書叅贊機務留守南都二十年深沉果斷每臨  
大議衆論盈庭徐以一言斷之衆皆悅服謚貞襄

王榮

王榮字希仁錢塘人永樂中以乙榜進士授全椒學訓導陞淮府左長史至宣宗朝歷官吏科都給事中受命纂仁考御製陞太僕少卿景泰元年英廟在虜庭命榮持節充奉迎使見太上皇上皇諭令還報命進太僕寺卿又四年致仕歸榮天才快敏爲文不屬思數千言立就有西漢氣骨立朝五十餘年聲實茂著

周安

周安字元靜仁和縣人永樂中以國子生授刑部主

事陞郎中安精聽讞慎刑法既履官卽遷處於外使志慮清曠務得獄情以是人樂輸誠徃無冤繫擢江西按察司副使矢志清白斤斤職守歷官二十餘年家無尺寸之增

于謙

于謙字廷益錢塘縣人生有異質甫七歲僧蘭古春奇之曰此子他日救時宰相也長遊邑庠領永樂庚子鄉薦明年登進士第宣德改元丙午拜山西道監察御史謙風儀峻整音吐鴻暢每入侍奏對宣宗必注聽院長都御史顧佐風紀甚嚴獨器重謙巡按

江西奏白誣獄出數十百人於死劾治王府之以和  
買害民者 上親征武定州罪人旣得命謙數其罪  
謙辭嚴義正矢口而成大稱 上旨庚戌河南山西  
災廷議必得大臣兼理之 上親署謙名擢兵部右  
侍郎賜勅以往謙年方三十有三感 上知遇夙夜  
經畫民大感悅九載秩滿進左侍郎謙在鎮久多善  
政在河南尤著若勸農糴粟官爲收糴以備賑荒預  
擬河患督採近地草束以備築堰公庾積久易敗卽  
減價而糴旁省亦獲以濟征輸稅有贏餘卽以鈔折  
納官民交便河流歲衝土城遂築大隄以障植柳以

爲固立舖設夫以備收補植柳於道以蔭行旅鑿井以濟道渴迄今存焉其在山西奏革大同鎮將役軍耕種之弊盡入其田爲軍屯復以大同遠在北邊乞專差御史一員巡歷其地庶奸弊可革遂永爲例議處修築鴈門軍役議派柴炭人夫通融有法仍奏減七分之一以甦民困時災傷民流移設法招撫又恐復業者憚於徵輸無復固志奏免所欠稅糧請著令有司考績以有無流民爲殿最使知驚焉嘗自河南抵山西夜經太行山有羣盜持行兵喊而前從者駭愕謙厲聲叱曰汝何爲者耶盜聞言大驚散去其德

威所著如此有叅議劉孔宗者律已甚嚴頗與流輩  
寡合衆構賊罪污之謙知其誣卽奏白其事恒以盈  
滿爲懼請舉叅政孫元貞王來以自代時中璫王振  
方用事嗾言者劾謙拉舉自代罷爲大理寺左少卿  
二省之民倍道赴闕交章乞留親藩亦以不可無謙  
爲請乃復命巡撫寔正統丙寅歲也明年復爲兵部  
右侍郎留理部事又明年己巳虜酋也先寇獨石馬  
營至秋遂猖獗 上下詔親征謙與尚書鄺埜上言  
邊方將官皆可託以制虜不必煩六師且 皇上宗  
廟社稷主無輕臨戎懇留不聽八月望日師次狼山



土木王師敗績 皇輿北狩京師大震時謙獨任部  
事北望號泣誓以滅虜將議集兵爲守護京師計會  
皇太后命郕王監國以係人心於時臺諫廷論土  
冰之變罪歸王振 王始攝朝倉卒未有處分錦衣  
衛指揮馬順素附振意頗不平衆起捽順擊死復索  
振所親信二內侍將擊之班行誼雜無復朝儀 王  
疑懼屢欲退諸大臣亦多歛避謙堅立不動特掖王  
請留且請降旨宣諭羣臣無擅動振罪候請命於  
太后行誅順罪應死勿論命將軍亟擊二內侍死衆  
乃定退朝漏過午刻謙袍袖爲裂吏部尚書王直執

謙手曰今日正賴公等若某百輩何能爲謙辭謝不敢當尋以人望進兵部尚書固辭不獲始就職謙受任多事之際首劾扈從失律者武臣顧興祖輩文官王佐輩皆議罪以聞 憲廟春秋方富正位東宮羣臣合辭請郕王嗣位尊 英宗爲太上皇帝改明年庚午爲景泰元年天下始知有君謙入見泣對曰虜賊不道犯我邊疆遮留 大駕彼旣得志將有長驅深入之勢不可不預爲計邇者各營精銳兵械俱盡宜亟募兵易漕卒以備調令工部分局治兵器以備用京師九門尤爲要地宜令都督孫鏜衛穎張軌張

義雷通分守選給事中御史如王竑輩佐之列營於外以振軍勢徙郭外居民於城內隨地安插無爲虜所害仍行虜所經由堅壁清野固守勿戰通州所積糧數百萬挽運固難棄之或以資虜宜令在官食糧者悉詣關支人以多寡受糧而歸全集京師庶幾兩便大同宣府嘗經標掠請勅各地方守臣協力防鎮訓練修飭務有備至於選用人才尤爲至務文臣如軒輊者宜令巡撫武臣如楊洪柳溥者宜爲將帥軍旅之事臣請身任其責不效則治臣之罪上皆嘉納之太監喜寧胡種也土木之潰歸降也先因爲

之用導之入寇虜奉 車駕趨紫荆關京師戒嚴朝  
臣至有挈家南奔者侍講徐理因謬言占象倡議南  
遷人心動搖謙抗言曰京師天下根本 宮廟山陵  
社稷在此百官萬姓帑藏食儲在此此而不守去將  
何之一動則大勢去矣宋南渡之事可鑑也太監金  
英時是謙言守議遂定主將石亨復爲異議欲盡閉  
九門堅壁避賊鋒謙言不可請率先士卒躬擐甲胄  
出營德勝門以示必死泣以忠義諭三軍人人感奮  
勇氣自倍十月朔日也先入紫荆關傳言送 駕還  
京前驅突至我軍堅不爲動知我有備稍自引却也

先次至城下對我壘而陳 駕亦在虜營虜覘我軍  
嚴整不敢有加於我我亦不敢向虜輕發一矢 朝  
廷日遣使至也先壘問安喜寧噉也先邀我六七大  
臣出城議和且需金帛等物萬萬計 廷議依違莫  
決禮部問謙謙曰今日止知有軍旅事他非所敢聞  
對壘凡七日虜移 駕就寬燥地隔壘漸遠乃舉砲  
擊虜營虜死砲下者萬計也先大沮宵遁大同叅將  
許貴奏欲遣使議和以緩虜兵徐爲討伐計謙謂虜  
情譎詐叵測和不足恃况中國與虜不共戴天之讐  
和則背君父而忘大義莫若選將練兵養威蓄銳無

輕遣使以取其侮從之謙以涿鹿真保定易州皆京  
師近地兵力單弱雖嘗遣都督劉安率兵巡視猶恐  
虜肆標掠力弗能支卽秦遣都指揮陳旺石端王信  
王虹輩分益以兵往爲之援復請勅右都督楊俊  
節之民恃以安又以虜之深入必先攻犯白羊紫荆  
倒馬諸關復奏撥兵與原守官軍互爲應援俾無債  
事諜報虜圍總兵朱謙於關子口明日復報追石亨  
於鴈門關烽火甚急遠邇騷動衆謂宜急發兵往援  
謙不爲動卽奏上方略密授亨等仍令各營選調軍  
馬若將尅日大舉者旋報虜已出境乃服謙料敵之

審謙謂喜寧不除虜卒弗靖乃以計授楊俊擒送京  
師謙廷劾其罪誅之自是虜竟畏憚悔禍不敢犯矣  
辛未也先遣使入貢請送大駕還京朝廷疑未  
之信下廷臣議謙曰此天意也君臣大義兄弟至親  
當速遣使奉迎以承天心萬一虜果懷詐我有辭矣  
議乃決秋九月英宗還自虜庭時邊事靖寧謙益  
修安內攘外之政河間東昌諸處永樂時安置降虜  
甚衆方虜入寇時勢欲乘機而動謙因南征奏遣其  
有名號者以行遂留於彼以爲潛消之計天青山  
祖宗陵寢所在而無城廓虜嘗犯其地乃起成山伯

王通城昌平徙民兵其中以衛陵寢且重邊關之援  
臨清漕舟所經舶輻輳實喉襟之地虜入寇時嘗有  
往據之謀乃奏遣平江伯陳豫築城以守遂爲重鎮  
尋謀知爲虜謀者乃我亡命小田兒也適雜虜使中  
來矚虛實謙奏授計於侍郎王偉因使大同道誅之  
初北邊獨石馬營八城爲虜所破謙謂此不可棄卽  
奏起都督孫安授以方略率兵度龍門關且戰且守  
由是八城復完謙謂京兵分隸五軍神機三千諸營  
者雖各有總兵然不相統或遇調發動相選敵兵將  
不識卒難濟事乃議以諸營馬步兵擇其精者十五



萬人分爲十營各立名號每營一都督一員總領之  
每五千用把總都指揮每千用把總一員每隊用管  
隊官二員團諳訓練體統既定兵將相識號令專一  
行伍不亂楊俊議奏盡出營兵併調三邊各路軍馬  
大舉勦虜可以得志謙執不可曰如此則京師各邊  
皆空虜或分兵牽制何以應之非兵家全勝之謀也  
上從謙言俊素跋扈時謂謙此議足以奪其心是  
時浙江福建有鄧茂七葉宗留廣東廣西有黃蕭養  
等乘時竊發殘破郡邑一時命將出師皆出謙籌畫  
卒用勦平貴州苗賊作亂侍郎何文淵奏乞罷布按

司復置宣慰司以土官蒞其地留諸司以轄諸衛遣  
大將鎮之謙謂貴州自祖宗開創八十年顧因小  
寇遽隳成功况土地人民皆受之祖宗者豈可輕  
棄事遂寢謙念北虜旣平軍國之務可緩懇辭兵柄  
復以天變乞罷皆不許初也先犯京師石亨因謙成  
功驟躋侯爵心不自安乃奏謙功宜官一子朝廷  
卽授其子寃前衛副千戶累疏懇辭且曰縱爲子求  
官亦不當假手於亨不許旣受命語寃曰我本書生  
當聖主憂勤之日分以死報顧功微報腆爾宜砥  
礪名節毋忝恩命朝廷復於京師之西賜第一

區謙上疏辭謂國家多事之秋豈臣子安居之日况  
星文示變宜貶損豈可厚享以重咎愆不許乃以平  
日所得賜物盛甲袍帶之屬移置第內封識加謹時  
一往視焉謙素苦痰喘寓直房以便朝謁一日疾作  
上遣太監御醫來視云此非竹瀝不可愈爲上

言親幸萬歲山伐竹以賜命計謙所用悉給自尚方  
蓋異寵也病少間復懇乞罷歸不許特降勅諭留  
免朝叅屢遣中使促謙出視事其爲上所倚重如  
此謙握兵久號令賞罰皆出於謙亨素貪縱素爲謙  
所裁積成嫌隙亨姪彪本驍將慮其一門同握京兵

乃奏遣彪充遊擊將軍往戍大同二人不得遂所私  
益切齒於謙思有以傾之矣丁丑正月 景皇帝不  
豫謙同廷臣上章乞復皇儲未報 英宗皇帝復正  
宸極亨等貪天之功掩爲已有卽誣謙等迎立外藩  
以爲罪與大學士王文六七大臣俱下獄所司以金  
牌勅符俱存他無顯跡可據亨等必欲置之於死會  
徐瑄者以倡南遷爲謙所斥久不獲進因易名有貞  
尤啣謙者廷鞫之日力言大肆拷掠宜無不承文不  
勝忿力辯不已謙曰亨等意已如此辯之何益所司  
承亨風旨乃以意欲二字附會成獄狀上 上猶豫

良久曰謙實有功衆未及對有貞直前曰若不置謙  
於死今日之事爲無名 上意乃決時錦衣指揮劉  
敬方帶刀在宿衛目覲其事每言及未嘗不以爲恨  
歿之日天日無輝朝野冤之先是杭湖水竭土裂人  
驚異之孫原貞方以尚書鎮浙語人曰賢才之生實  
鍾山川之秀今日之兆哲人其萎乎至是卒驗云謙  
之生爲洪武戊寅得壽六十而已惜哉子冤謫戍龍  
門所司籍謙家自 朝廷所賜外他無一物蓋謙平  
日自律之嚴也未幾陳汝言代爲兵部以賄敗 上  
命陳所籍物於大內廡下召大臣入視且曰景泰間

謙任事久且專沒無餘物汝言未幾何得賄無算耶  
上色變久之亨等俛首不敢動撫寧伯朱永出謂  
人曰今日觀上意亨輩將無逃矣一日邊報甚急  
集廷臣議恭順侯吳瑾進曰于謙在這患不至此  
上爲之默然初謙被害時皇太后未及知比聞嗟  
悼累日上聞之益悟其冤深悔之旣而有貞以罪  
遠竄亨等坐謀逆滅此皆上天有所懲而亦天道好  
還之明驗也成化紀元冕訟謙冤憲宗聞而憫之  
追復故秩授冕兵部員外累官應天府尹遣行人司  
行人馬瞻往祭其墓其文有曰當國家之多難保社

稷以無虞惟公道而自持爲權奸之所害在 先帝

已知其往而朕心實憐其忠由是天下稱快未幾冕  
任應天府尹致仕歸復列謙平生行業請如制贈謚  
以慰泉下事下禮部議僉謂古今人臣能爲國家建  
大義成大功者生則有旌擢之恩歿則有褒恤之典  
若前宋岳飛盡忠報國死非其罪其追謚祠祀在宋  
具已舉行謙受冤雖同而功業所就則大過之宜如  
其子所請制可賜謚曰肅愍建祠於墓表曰旌功命  
有司春秋致祭謙天性狷介不立私黨一以忠誠結  
主知分謫任怨無所顧忌不貸賊吏而恒宥小過

急於薦賢不遺一善歷事三朝位極人臣故廬之在  
杭者未嘗增尺寸內外艱歸蕭然不異寒士孤忠峻  
節夷險弗渝可謂難矣平居好學手不釋卷爲文有  
奇氣詩詞清麗膾炙人口尤長於奏疏當政務劬午  
章日數十上累千萬言揮筆如流皆切中事機平生  
著述甚多今僅存節菴詩文稿奏議各若干卷

### 周 文

周文字顯謨富陽人永樂癸卯舉人授福建武平縣  
教諭選河南道監察御史巡按廣東赫著聲績秉公  
持憲百度振揚時中官王振方用事文疏論之學士



倪謙以憂制留用文固請容謙終制言雖不用識者  
重其敢言屬貴州苗賊猖熾總帥偵師 朝議命文  
督兵偕靖遠伯王驥往勦至則單車詣賊壘宣諭  
國威賊果歸款未幾以憂歸卒於家

### 謝 衡

謝衡字仲平仁和縣人永樂甲辰進士授監察御史  
舉刺不避臺殿生風尋奉 命與給事中耿九疇往  
勘事不阿時宰大忤其意時鹽法沮壞轉運非人  
上意欲得廷臣賢者爲之叅伍 廷議用衡與九疇  
爲淮北淮南運司同知九疇不數歲遂至刑部尚書

爲世名卿而衡以親喪歸卒不究其用士論惜之

朱祚

朱祚字永年海寧縣人性聰敏九歲能詩永樂八年  
以秀才徵試詹事府尋爲鎮遠侯家塾教官十三年  
進元宵觀燈賦上喜而資之由是知名洪熙初用  
尚寶少卿袁忠徹薦擢行在中書舍人宣宗見其  
詞賦處之近密特陞翰林院修撰秩滿陞尚寶司少  
卿命教中貴人書祚能詩文援筆立就負氣好直言  
不恤毀譽晚稍自懲因號默齋且善談命言人禍福  
多中云

沈慶

沈慶字仲會餘杭縣人學博才瞻善風角精魚鳥陣法宣德初由舉人官翰林院五經博士大學士陳循薦慶可大用陞湖廣僉事時靖州五開賊起慶相度地宜鑿河渠濬隍塹自偏橋鎮直抵黃平迂道千餘里由是據壕立兵始以地利制賊軍民賴之叛賊李珍蒙能桀驁猖狂至僭王號慶親率兵突陣殲厥渠魁擒獲賊黨二百餘人成化初復統兵十萬進攻臘屋桃林武岡南洞等處一鼓悉擒加三品俸進階亞中大夫成化辛卯以老乞歸所著有拙菴集

蔣琳

蔣琳字廷振錢塘縣人驥之子宣德間以父任授兵部職方司主事陞車駕郎中以才望推從大司馬靖遠伯王公征討西至甘涼南踰隴川運籌設策屢有戰功擢通政司右通政進都察院左副都御史琳爲人果決清介喜於立功任氣敢往奉官執法萬夫莫回而於人之喜怒身之禍福不計也當巡撫貴州號令精明威望振肅藩臬大吏咸悚然憚之先是草塘夷叛官軍屢有挫衄莫敢議討琳至獎率士伍親履行陣爲諸將先由是吏士用命戰氣自倍長驅賊巢

擒斬無算劇寇旣平諸夷震恐然以操法嚴急卒爲怨家構死

張珍

張珍卽張翺字羽臯仁和人生而穎異氣宇冲粹幼業儒涉獵經史流覽百家至於推步天文占望風氣若有神授宣德間有潘中丞者浙人也將往南粵視師素知翺有兵略習占候除室迎之翺感知已强與偕行一日坐帳中仰視片雲隱起謂潘曰事濟矣烈風南來乃賊兆也已而果驗多獲首虜潘欲疏薦翺翺曰所以共事戎行者報知己也可以名爵相免乎

竟逃去易名晦迹以終其身嘗以詩自述曰有意欲  
嘗千日酒無心去傍五侯烟蓋其志也  
子曰吾推數循理後人必有大吾宗者  
歟死數十年  
曾孫應祺應祐玄孫瀚濂洵洽溥洲皆相繼登高科  
躋膺仕人益服其先見云

鄒幹

鄒幹字宗盛餘杭縣人父濟永樂中爲少詹事事  
仁廟於春官甚被禮遇幹初生卽遣補應天府學生  
命月食米一石終其身幹正統四年進士初授兵部  
職方司主事歷陞武選司員外郎中  
英廟北狩京

城戒嚴幹超遷本部右侍郎凡處繁應變或不待奏報而行一日鄉民萬餘欲避虜城中叫號求入守者難之幹曰城以衛民有急而拒之非計也於是立主開門衆獲以濟景泰初轉禮部尋奉命往山西考察官吏人服其公適河南鳳陽等大水命往賑濟奏免稅糧若干萬石督理易州山廠能祛宿弊居三年召還治部事陞左侍郎天順初尚書胡濙致仕去諸典禮悉從幹詳定英廟常有不期問幹掩口以對英廟不悅坐是久不遷成化二年巡撫畿內陞南京禮部尚書旋改吏部加太子少保累乞骸命馳驛歸

月給米歲給役夫弘治間浙江歲饑幹具疏奏聞  
孝廟嘉其憂民勅有司備羊酒綵段勞之比至而幹  
已卒年八十四訃聞賜祭葬贈太子太保謚康靖幹  
體貌癯然若不勝衣清慎自持終始不變士論多之

陳信

陳信字履信仁和縣人少以修謹推擇爲吏益務守  
廉服食家自給之宣德間以薦擢大理評事改南京  
西城兵馬副指揮陞蘇州府通判却例獻慎官箴清  
操益勵督餉之京部民爭獻白金爲贐信悉拒却事  
竣乞歸田里道經吳門前之餽金者復來獻贐信一



無所受蘇人杜瓊贈詩云南還依舊一青瑣又却吳  
民餽贖錢縱使此生貧到骨只留清白與人傳

夏時正

夏時正字季爵其先慈谿徙仁和正統十年進士歷  
刑部郎中讞獄福建會上杭大饑盜且起輒發倉賑  
贍不待報天順初進大理丞以母老乞致仕不許乞  
移近地便養改南京進少卿成化初改太常已又進  
南京大理卿七年歲大侵巡視江西斥貪墨吏二百  
二十人革冗徭理庾賦放無名之稅十餘萬勸民粟  
七十萬石賑饑民三十三萬修南昌城堤城得不壞

長河洞人叛單車撫定疏時弊二十事當路人不悅  
謂其好名遂致仕歸仁和僦居民舍布政使張瓚爲  
西湖書院於孤山以處之已而書院火歸慈谿已又  
還杭凡家食三十年卒年八十八卒之歲猶日書蠅  
頭字校讐不輟博學高才工詩文善書多著述尤詳  
禮文之事葉盛稱其文如春空層雲動含雨意又如  
簇蠶抽絲秋鶴引吭云

### 周子良

周子良錢塘人正統間爲職方卽苦節縮縮自持謙  
退數鬻戶產以支宦費有千戶王者以事褫職良愛

其材貸之已而王緣其臧從三百金入酬良駭而大叱欲暴於衆因伏罪索免乃麾去凡世廉工類懷刻削迹此知其非世廉也

沈敬

沈敬字克欽錢塘縣人正統戊辰進士授兵部主事累官郎中公忠正直爲權奸所惡景泰末謫戍遼陽成化改元詔復其官超拜河南叅政歲饑民流敬及時賑發全活甚衆計處榆林饋餉供用不乏勞績顯著賜白金文綺轉廣西左布政使時田州黃明倡亂殺逐知府岑溥敬受督撫檄統衆征勦鼓勇率

師大致克捷梟明父子擒斬無算觸險乘瘴深入賊巢竟中毒死 朝廷官其子錡

夏 誠

夏誠字克誠錢塘縣人由舉人正統初任沙縣教諭清慎有志操部使者上其賢擢監察御史已巳車駕北征誠扈從至土木乘輿陷虜中誠死于難後 朝廷追錄死事忠勤官其子繼先至撫州知府

周 倫

周倫字敘昌杭州右衛人穎敏博洽正統甲申舉鄉試歷嘉定容城訓導終永寧教諭所至講讀無間寒

暑至老不倦教人曲盡恩義事上以禮耻隨時容悅  
與人言剖析是非不爲依違未嘗枉已以干權勢爲  
廣文者三十年意豁如也喜赴人急難排斥異端有  
剛方之節貪懦者聞風憚之

張珩

張珩字鳴玉仁和縣人少特力好修嘗以一介不取  
爲本分內事訾溫州却金亭爲近名人多以廉士期  
之景泰元年領鄉薦甲戌授監察御史整點京營壯  
羸老弱過目輒不怠人皆憚其明察丙戌陞廣東按  
察司僉事尋改山東發奸摘伏如神部衆驚服性廉

介中貴溫某感其舊德餉以金綺玠拒却之溫愧而  
擲于河甲午陞本省副使致仕歸時橐中蕭然僅如  
素士卒之日幾無以爲殮

吳福

吳福字天爵錢塘縣人初起刑部掾屬以從征閩寇  
鄧茂七有功授兵部司務景泰二年復從都御史蔣  
琳撫貴州叛夷尋改工部福爲人廉直義不苟取嘗  
過寶應宿驛中獲遺金數百兩急呼驛官掌之詰朝  
付縣爲修學費尚書倪謙學士錢溥咸爲紀其事  
以多誦美之仕終武昌府知府子俊孫光世相繼

竹第顯云

江玘

字用良仁和縣人景泰辛未進士授禮科給事  
苞立朝權貴斂手嘗以六事奏陳悉關君德民  
寧傾聽已而諫罷僧牒濫行疏救按察使陳璇  
劾奏石亨怙寵罔上直聲赫然時南陽李方柄  
丁趨其門獨玘不可曰吾爲諫臣可媚時宰以  
耶固不往居諫垣十年出爲山東叅議又九載  
遷叅政凡所歷宗藩莊地有兼併者悉奪以還民  
會督遼東軍儲嚴禁巨商賂遺歸途惟故衣一篋水

襲之聲震于遠邇領兵農金穀諸務不假筆楚而事  
集酷急者反不及焉未幾乞休橐裝蕭然世業讓諸  
兄弟而幅巾藜杖行歌坐吟夷猶泮渙未嘗請托入  
公府以子瀾貴贈大中大夫資治少尹夏太卿稱其  
皎然冰雪年未至而請老可以愧彼冥頑嗜進之徒  
諒哉

王獻

王獻字惟臣號退菴仁和人景泰辛未登進士第與  
狀元柯潛等二十八人同進學東閣賜居第給大官  
酒饌及膏紙費命內閣大臣典領之不出就外署一



如永樂初科故事獻感際遇益肆力於學工古文詞  
在同年中最號敏瞻時猶未娶吏部侍郎淳安項公  
見而奇之以女妻焉癸酉授編修修寰宇通志陞修  
撰天順初乞歸省賜路費寶鈔逾年還朝命入內館  
授中貴人書癸未春同考會試會貢院火秋復試復  
爲同考是科先後兩人簾不改命者惟獻一人丙戌  
修撰秩且滿父訃至卽日陞辭星夜行抵家治喪葬  
戚易兩至暇日與鄉人接恂恂謹厚無一毫早達貴  
侈之態人以爲難服闋陞左春坊左諭德兼修撰庚  
寅命充經筵日講官賜大紅織金襲衣束帶冠履辛

卯再賜大紅羅衣一襲是秋主考順天鄉試壬辰充  
廷試讀卷官賜寶鏹千緡未幾陞翰林學士癸巳賜  
金帶本朝學士非典密務侍日講者皆不與是賜蓋  
異數也乙未復充廷試讀卷官賜寶鏹千緡丁酉朝  
廷用儒臣議追崇先聖禮樂遣獻祭告闕里比還適  
所嘗與修宋元通鑑成陞詹事府少詹事仍兼學士  
戊戌 皇太子出閣侍講讀於文華殿又命偕學士  
南昌謝公教庶吉士梁儲等於玉堂外署辛丑主考  
會試壬寅修文華大訓成陞禮部左侍郎丁未再充  
廷試讀卷官復再賜寶鈔蓋自擢第入翰林於今三

十有七年先後握院章者十有六年而年甫五十遂致仕以歸

吳誠

吳誠字尚忠錢塘縣人景泰辛未進士授兵部武庫司主事歷吏部考功郎中陞四川叅政進湖廣左右布政使陞副都御史巡撫湖廣明年改雲南卒於官誠才識宏遠前後所歷皆有政績賢聲其撫雲南叛夷尤盡心力爲人淳朴簡重孝友誠確耻言人過與人交惇信義久而不渝宅心恬澹衣裘朴野居鄉混迹間巷未嘗飭趨從盛車徒嘗以婚禮盛服入城鄉

人廣南守徐敏見之疑其變節過朱叅政鏞所言及相與嗟悼之頃則誠至見二人有不豫色詢其故二人曰時俗可傷也誠曰非以誠今日輿服之異常與二人曰然誠告以故且謝過卽屏去復衣故衣其淳朴如此子瑞官御史砥節勵行卒歛具不給稱濟美云

### 彭信

彭信字中孚仁和縣人少力學工文詞在諸生中已燁然有聲景泰辛未登進士選翰林庶吉士癸未擢山東道御史巡歷紫荆諸關塞修城堡建斥堠防慮

周悉邊庭賴以無警乙亥巡按廣東時嶺南未靖武將專征易信爲儒生不知兵一日出師誓衆間爲陳說方略申嚴號令揆度事機切中要害卒之殄滅夷僚兵無挫衄指縱之功居多俘奏帥以所得賞格讓信曰吾文士也吾自有階奚以武爲識者偉其功而多其不伐丁丑犇父喪歸服除改貴州道監察御史巡按陝西歲滿且代藩憲交章願留謂關右民勁悍其吳悞者至不能自立按法治之彊者鋤弱者植威惠並行得憲臣體壬午巡按河南風聲所至奸宄屏跡吏無受賕流移占復秩滿陞順天府丞順天畿甸

在輦轂下征徭常倍徙他郡加之達官貴人園田錯  
午侵牟武斷民用困瘁贊治之暇周行列邑楊摧折  
之威施拊循之政方嚴之下惠裕繼之三年奏課陞  
應天府尹壬辰四月甫蒞任秋八月感風疾而卒先  
一月其兄恭自杭奉太恭人來就養時年七十有九  
退自公輒携其子娛嬉母前詰朝而病不起矣爲人  
性度坦夷有納污藏疾之量至於遇事敢爲果斷立  
發則又不茹柔吐剛故所在咸著聲績卒年五十有  
二已耳

何琮

何琮字文璧仁和縣人知府瀕之子景泰甲戌進士  
改庶吉士讀書中秘預修寰宇通志書成 賜白金  
練幣遂除禮科給事中遇事侃侃敢言凡百司上章  
奏當叅駁者衆相視莫知指辭琮注以一二語輒中  
要領人無異言尤善敷奏每對仗彈劾音吐清亮

上注意焉適滿剌加國請封以次當爲正使所司以  
名聞 上顧左右曰茲面黃白而善敷奏者邪胡爲  
遣之乃內批改他給事中同列有忌之者他日有彈  
不以屬之 上曰今日彈文胡不令何某讀之且傳  
旨今後必以命焉衆方知 上有意於琮也嘗以

學校士習所係上章請嚴學政精汰太學生昏老老  
士多不樂肆爲謗訕然琮持身嚴掇拾無所得久乃  
帖服適通政缺員以善敷奏特陞右叅議成化五年  
轉左歲辛卯丁母憂復陞左通政時猶家居也特

詔起之琮諳練事體且恪勤匪懈十七年陞通政使  
前此規矩廢弛甚積弊頗多一蒞之以嚴不數月間  
法立弊除然亦以此得謫歲乙未陞兵部右侍郎時  
尚書缺專理部政遇事詳慎凡有施行必問其屬曰  
舊比如何必按故典而折衷以時宜故事無留滯垂  
舛者未幾轉左尚書余公子俊馬公文升相繼來爲



之長皆輔以誠心正道不立異而掠美二公亦推誠共事無有間言 孝宗卽位之二年通前任歷三考當遷尚書兩京無缺員特加二品俸而仍其舊職僅閱月而卒年六十二賜祭葬如例性直諒而尤嫉惡見事有不平者輒爲之忿疾居官清介一毫不妄取與門無雜賓立朝幾四十年勤慎如一日尤留心世務事未至而預爲之遠圖於書無所不讀而尤究心於易有事輒稽於卜而篤信不疑公餘歸私宅縱步花逕間口不絕吟咏又嘗以西湖爲杭之眉目昔人導之以資灌溉近爲居民占據以爲田圃恐其久而

愈湮塞也既言之當道聞於朝而疏浚之又著西湖圖說以示後人其於醫道有所得辦正處方出人意表專其業者亦或推以爲不及云

李昂

李昂字文舉仁和縣人景泰甲戌進士除工部都水司主事改兵部車駕司陞山東青州府知府年始三十有一以其少未更事爲慮至則廢政悉舉郡中稱治將滿去民狀政績三十有四事上於巡撫大臣願留終惠一郡俄陞福建布政司右叅政民懷思不已刻像於表海亭列邑皆祠祀或有冤不得申者輒走

祠下愬之其得民如此丁內艱服除改山東尋進右布政使舊治民鼓舞而迎者載道再轉河南左布政使時值歲歉悉力賑恤又吏弊多端作吏範門約禁典以戒飭之四月適江西盜起贛州聚衆劫掠會昌信豐諸縣殺郡縣官其勢甚熾遂擢都察院右副都御史以往時官吏因循多不用命痛繩以法乃議建營堡壓賊巢穴使不能出別募勇敢士與民同操習已而進兵賊聞風皆披靡斬獲不可勝數事聞 朝廷賜勅獎諭昂以今賊雖滅當立守禦計蓋會昌與福建接境萬山阻絕爲上杭武平流賊所聚雖嘗有

兵守禦而寡弱不支宜卽會昌武平立行都司以統諸衛乃創巡檢司於龍南要地庶得無虞奏上皆從之賊平疏乞致仕不從移總督漕運後以江西怨家騰謗去位昂爲人精勤明敏才氣沛然遇事能爲若無難者性尤孝友每恨早孤語及其父輒嗚咽不已奉母夫人曲盡色養素好文翰所著述多有可觀有文集四卷奏議三卷藏於家

項麒

項麒字文祥仁和縣人幼有異質年八歲督學花公潤生試之大奇遂命入邑庠景泰七年由進士授南

京吏部司務歷陞南京刑部郎中當 憲皇登極初  
詔求直言麒麟應 詔陳五事一曰務正學二曰納諫  
諍三曰崇節義四曰遠近習五曰弭天變其崇節義  
章大約謂李賢王翱當曹吉祥之變不能奮身死義  
甘心屈膝以圖苟免不知節義廉耻爲何物宜顯正  
典刑以訓在位云云其遠近習則指王振曹吉祥之  
事以爲近戒宜收攬威福不使任事復其掃除之役  
云云語甚切直皆人所不敢言無何以病乞致仕家  
居三十年絕跡公府甘貧屢空寄居于人巡按吳公  
某高其節槩授室一椽始遂栖托有平湖尹以賄敗

憲使邵公某因舉麒清節諭之盖媿之也尹意邵雅  
重麒卽暮持百金求爲管解麒嚴拒不受尹慙而退  
未幾以無疾終後巡按御史唐公鳳儀以麒與王公  
琦褚公遂良同里表其里爲忠清里奉二公之主祀  
于褚廟學使孔公天胤等又別建揚清祠以祀王項  
二公云

劉泰

劉泰字士亨錢塘縣人負奇志特立不羣景泰天順  
間隱居武林城中好學篤行肆其餘力於詩精麗奇  
偉爲一時絕唱每一篇出則競相傳誦南北之士來

客江左者歸必得泰一詩以取重鄉里否則雖金珠滿橐不足誇詡也風雪中蕭然環堵人不能堪泰吟詠自得無幾微憂愁抑鬱之意其高尚固不在袁邵諸公下與王琦鄭厚相交善事母孝母卒號痛踰常鬚鬢爲白所著有菊莊晚香雪餘倡和諸集

孫暉

孫暉字景暉海寧縣人景泰壬申以賢良方正薦授江西泰和縣縣丞邑素多豪大家暉奉職循理不爲威屈嘗親定徭役旦夕令下請托不及行人稱爲霹靂手指其牒爲鐵板榜文言其公平允當不可更易

也擢博白縣知縣韓襄毅雍征大藤峽暉從行多著  
勞績超授潯州府知府改立郡學以作興人才文教  
聿起哨守諸將失律喪師暉宣布威德輯和民夷邊  
鄙不聳歲饑米價翔湧出公廩粟減直以惠濟之屬  
邑有爲民蠹者逮其尤署諸法邊郡大治擢山東右  
叅政致仕

林章

林章字以成錢塘人幼而敏悟藩司薦於朝景泰初  
授中書舍人遂直內閣遷禮部員外郎天順初文簿  
叢沓會有大典禮事出倉猝方稽據故實章預具籍



冊無所遺失李文達公殊愛之超遷禮部郎中成化二年九載秩滿遷山東布政司左叅議寄祿順天府朝謁任事皆如故三年預修英廟實錄成擢太常寺少卿十二年秩再滿進爲卿以父喪服闋弘治四年憲廟實錄成時資勞愈積而限於格例於是祿再加而官不復進中間若大明一統志續通鑑綱目諸纂述事必預必有金幣楮鏹酒饌之賜後以母喪服闋遂上疏請老進一階致仕章以二子皆仕就養京師累閱歲階亦再進衣鶴腰玉以歸未幾而卒素孝謹親疾必額天請代母老迎養于官每公暇不去

左右兄弟睦族急人患難非疾病未嘗一日不入朝  
書法遒勁尤精鑒賞博文習見能道先朝臺閣事歷  
歷可聽云

汪諧

汪諧字伯諧仁和縣人少時冒籍順天香河縣舉闈  
鄉試尋被革歸復舉浙江鄉試登天順四年進士改  
翰林院庶吉士授編修纂修英廟實錄成化三年  
陞修撰九年秩滿陞右春坊右諭德修續資治通鑑  
綱目十三年陞右庶子侍上於東宮講讀上登  
極陞少詹事兼侍講學士充經筵講官修憲廟實

錄充副總裁後以疾在告久請停俸弗許弘治四年  
陞禮部右侍郎兼學士遂請老許之至是卒年六十  
八贈禮部尚書賜祭葬給驛歸其喪諸儀度整潔深  
衷簡言慮事周悉晚益慎密方嚮進而困于疾疾弗  
究于用其父澄舉進士爲監察御史坐法遺戒諸子  
勿讀書諧旣貴弟篴亦舉進士及卒子登廕中書舍  
人舉賜皆繼舉進士

邵琮

邵琮字叔璋仁和縣人登天順庚辰進士授大理評  
事持法嚴明存心公恕諸讞鞫多所平反累擢湖廣

僉事時武岡諸縣初燬於兵琮至竭力撫綏築城建  
縣士民倚之又運青設策擒孝感巨寇李善境內帖  
然陟四川按察司副使俗善告訐而琮聽斷精核庭  
無留獄至于抑陳謙之橫雪李明之冤尤其著者未  
幾致政歸徜徉湖山足跡不入公府人高其賢孫曰  
梗仕至福建副使

凌 鎬

凌鎬字叔京新城縣人誌任天順庚辰進士癸未授  
南京刑部主事丁外艱改禮部在任逾五載未調或  
以進取說之鎬曰在郎署猶患弗稱敢他望耶人皆

高其恬雅性質實耻爲導諛事或未善雖尊者前懇  
懇論弗避嘗以此齟齬于人至其臨下恩意優厚未  
嘗以惡聲加也居官廉靖卒之日囊無遺貲京邸多  
逋負人不責其償喪始得歸

### 鄭環

鄭環字璠夫仁和縣人厚子天順庚辰進士及第授  
翰林院編修與修英廟實錄資治通鑑續綱目遷  
修撰再遷司經局洗馬主考兩京鄉試授皇太子  
經筵文華殿降南京太常少卿環欲迎養其母母不  
欲行乃留妻以代養環獨處京邸人或勸買妾環曰

若是則以養母結吾婦矣比歸省則妻已卒乃奉母之官終身不娶平生直諒誠慤人有過則正色規之方毅寡諧同列多不樂近然察環無他腸竟亦不深怨尚書魏文靖公嘗書戒子云事事當法杭之鄭某庶可爲人矣其見重于名賢若此所著有栗庵稿藏于家

張順

張順字弘裕杭州右衛人天順間由舉人授沔陽州學正丁內艱服闋補平度州已而又改定州順爲人高邁閒曠襟抱灑灑工諷咏善鼓琴三爲學博務以

弦歌化人積官六年不遷意澹如也平生勇於爲義鄉人沈明嘗忤縣令陸樞樞欲陷之死適有井中屍竟坐明明被拷掠不得已誣服樞入覲囑丞斃之獄順聞之往告丞曰人命至重君職爲丞當平反冤繫以補令缺顧可殺人以媚人邪丞悟轉聞其事于上明得不死

于冕

于冕字景瞻錢塘縣人少保兵部尚書謙子也英宗北征時奉命輔郕王監國土木之變大駕蒙塵中外恒懼謙撫安京甸遥制邊關虜歲薄城隨機

戰守虜知中國有備而後和議始定奉 駕南還是  
時微謙社稷幾于顛危 英廟終于沙漠矣迨奪門  
啟變亨祥等羣嫉其功起而嗾殺之時冕以父功廕  
府軍千戶謙死冕謫戍龍門間關萬里屢濱死亡成  
化紀元冕上疏極訟父冤 憲宗素憐其忠誠至是  
事愈白追贈大司馬謚肅愍命有司專祠祀之復冕  
原秩冕請改文資授武庫員外歷祠部郎中陞南京  
太僕寺少卿遷應天府尹致仕歸冕生平聰明特達  
好學知禮小心勤恪善處興廢成敗之間旣構家難  
放徙窮邊能杜門却掃日以讀書慕言爲事故雖罹



憂患疾疢而聲問不殞文譽卓然後起謫籍歷官兩  
京所在以修謹廉介著稱論者謂無愧名臣之子云